

■ GLOSSA

«Di da gritta»

DA SILVIO CAMENISCH

Nus avain ina colliaziun directa cun noss schurnalists reporters da crisas e guerras en l'exteriur Antonia Rados ed Ulrich Tilgner. Co vesais Vus la situaziun momentana al lieu? Quà a Cairo da la Rumantschia daventa la situaziun critica. Opponents cunter il rg han clamà si per sonda proxima al «Di da gritta», er en l'intern da la terra. Da noss hotelpalast anor vesain nus mintg minuta missils idiomatics cunter il sez dal guvern. Dus da quels projectils èn penetrads en la Chasa rumantscha ed han destrui las datas dal Pledari Grond online. Era la chasa istorica è zunt donnegiada ed i ha dà blessads.

Qua en la retroterra, il hinterland, vegn clamà si al «Stai si defenda!» general, «Di da gritta» che mes collega Ulrich Tilgner ha menziunà. En las ritschas serradas dals Muothists sa chatta glied sco il prinzipoet fitg fitg regiunal, el vegn considerà sco manadar spiertal da l'opposiziun, dasper intellectuals provinziels er dal territori dals Lanselots, l'emprima giada ch'opponents ed exponats da l'elita spiertala da tuttasduas retroterras sa chattan en prontezza da cumbat, tut-



tas autras giadas er'ins sa chattà, jau manegel s'embratschà a muments, jau manegel events da cultura e litteratura patriotica fitg en trend.

Qua en il center istoric da Cairo han gì lieu l'entir di antidemonstraziuns da rebellants militants cunter il Mubarak da la Rumantschia. Ins è intenziunà da metter giu la veglia dictatura da linguas e furmar la nova democrazia. A partir da la damaun sblundregian opponents vehements ils numerus magasins da meds d'instruziun en la lingua odiada ed als zappitschan e brischan sin piazza publica. Ina ripresa dals cudeschs brischeds! Nus qua en l'hotelpalast vesain da quai pauc, ma vesain il bun fim dad Abel a s'auzar cunter tschiel tar il babs eterns. Muoth. Lansel. Tschels.

Lung la via Sursilvana ed Ler Lumneziana han opponents pendì vi da latschs poppas da lumpas fitg da Sennentuntschi, che mussan manaders e manadras da la lingua odiada. Avertiments smanatschants cunter tschiel quant da deutschert ch'ils pro idioms manegian quella giada. Tschella giada main, quella giada bain! Il poet regiunal legia spontanamain en tuttas ustarias si e giu per tudestg da scrittira e rumantsch idiomatic. Las spendas e collectas giaian tuttas en la cassa d'opposiziun, e sco recumpensa duess vegnir edida ina munaida dal grond poet.

Co vesais Vus Ulrich Tilgner ils proxims temps? Da noss hotelpalast anor vesain nus naira notg e cotschen-fieu sur la citad da Cuira il center spiertal da la Rumantschia en stadi excepziunal. La crisa è daventada daditg ina guerra sontga. Dapertut han ins fatg bloccadas, las vias èn plainas iconoduls ed iconoclasts e quasi mintg'ura sa siglientan en l'aria marters u martras da l'opposiziun. Momentan regia scumond da sortir. Fin il «Di da gritta» sonda proxima tschertgan tuts turists da skialpin da bandunar il pajais. Grazia fitg Antonia Rados ed Ulrich Tilgner. Dai adatg da vus.